

09- Yanayotegemewa Kutoka Safarini

Anza safari yako kwa kuomba du'aa za kipando na safari¹. Katika ndege jishughulisha na kumdhukuru Allaah (سبحانه وتعالى) kwa kusoma Qur-aan, *istighfaar*, *tasbiyh*, *tahmiyd*, *tahliyl*, *takbiyr*, du'aa, kumswalia Rasuli (صلى الله عليه وآله وسلم) n.k. Usitizame filamu za anasa zinazowekwa katika ndege, zipuuze kabisa na epusha macho na masikio yako kusikiliza na kutazama maasi.

1-Kuchelewa Uwanja Wa Ndege Au Mpakani

Huenda mkachelewa sana kiwanja cha ndege cha Jeddah, kwa hiyo jitayarishe kwa kuvuta subira. Ikiwa unatoka nchi za karibu jichukulie vitafunio katika begi la mkono. Usichukue vyakula vya kupikwa nyumbani kwani serikali ya Saudia inatahadharisha kukhofia magonjwa. Bora zaidi ubadilishe pesa kwa Riyali za Saudia kununulia chakula kwenye kiwanja cha ndege. Hali ni hiyo hiyo mpakani kwa wanaosafiri kwa gari.

2-Zahma

Bila shaka utakutana na zahma kila mahali. Na hakuna kuepukana na jambo hili isipokuwa kuvuta subira ya hali ya juu na kujiepusha kusukumana na Mahujaji na kusababisha maudhi na magomvi ukaja kuharibu Hajj yako.

3-Safari Baina Ya Makkah Na Madiynah

Huenda mkasimama vituoni kuswali. Chukua malapa kwa ajili ya kuingia msalani. Usisahau kuchukua mfuko wako ambao una vitu muhimu.

4-Chakula

Vyakula vya kila aina vinapatikana mahotelini na mikahawani. Hakikisha unanunua chakula katika sehemu zilizo safi ili ujikinge kula chakula kichafu au kilichoharibika.

5-Hali ya hewa

¹ Rejea mlango wa Du'aa za Kuhifadhi.

Inategemea miezi unayokwenda. Siku za joto ni kuanzia mwezi wa Mei mpaka takriban Oktoba. Ama kuanzia Novemba hadi Machi, hali ya hewa kawaida huwa ni nzuri na huenda hata ikawa baridi ya kiasi. Kwa hiyo chukua nguo kulingana na hali ya hewa huko.

6-Kupotea

Kupotea au kupoteana huko ni jambo lisiloepukika hasa katika Haram mbili; Masjid Al-Haraam na Masjid An-Nabawiy wakati wa kutoka nje. Kupoteana kunasababika zaidi kutokana kutokujiandaa vizuri na wenzako kuhusu hatua za kuchukua. Kujiandaa huko ni muhimu kwa sababu anaweza mtu kuchanganyikiwa akili kwa khofu na zahma iliyoko huko hasa kwa ambaye hana uzoefu wa kuweco huko! Hatua zifuatazo huenda zikasaidia:

- Ainisha muda maalumu wa kukutana na wale watakaochelewa kutoka Masjid huku ukichunga kutokucheleweshwa kutekeleza taratibu za 'Ibaadah zinazokupasa kuzitenda wakati huo.
- Agana na wenzako kabla ya kuingia Masjid mkutane sehemu maalumu mnapotoka Masjid. Mfano, chagua jumba au duka iwe ni alama yenu ya kukutana.
- Wanawake wanaweza kujiwekea alama maalumu katika 'abaayah zao kwa ajili ya kutambuana, au kuvaa kanga ili watambuane. Lakini alama au kanga zisiwe zenye maneno au picha za viumbe kwani hizo hazifai kuswalia.
- Hakikisha kila mtu katika kikundi chenu amefahamu sawasawa muongozo kuhusu hatua za kuchukua wakati wa kupotea.
- Usiache kuvaa kadi au beji yako uliopewa na shirika ili utambulike haraka inapofika hali ya dharura kama kupotea, kuzimia, kufariki. Unaposwali ivue kwani kuswali na picha haifai
- Jaribu kuangaza kwa makini jengo la Masjid Al-Haraam lilivyo na maeneyo yake ya nje pamoja na hoteli zinazokabiliana nalo, uweze kutambua njia ya kuelekea hoteli uliyofikia.

Picha ifuatayo inaonyesha magezi mawili makubwa yaliyoko kati ya minara miwili; wa kulia ni kwako ukiwa unaangalia katika ukurasa huu, ni Geti la Malik 'Abdul-'Aziz na wa kushotoni ni Geti la Malik Fahd. Geti la Malik 'Abdul-'Aziz linakabiliwa na 'Waqf Malik 'Abdul-'Aziz'; mahoteli na maduka katika jengo lenye mnara wa saa ya kijani.

Geti la Malik Fahd linakabiliwa na hotel ya 'Dar At-Tawhiyd', na kuna upanuzi mkubwa wa Masjid Al-Haram katika maeneo hayo miaka tokea mwaka 1434 hadi 1436H.



- Kumbuka jina la mlango mnaoingilia kwani kila mlango umeandikwa jina lake, hivyo itakuwa sahali kukutana hapo.

7-Kupotelewa pesa, simu n.k.

Kuna sehemu ya kuripoti vitu vilivyopotea. Ripoti haraka huenda ukajaaliwa kupata kilichokupotea. Tahadhari na wezi kwani kuna watu wasio na iymaan wala hayaa ambao wanakuja kwenye 'ibaadah hiyo huko watokapo kuja kuwaibia Mahujaji!! Ni wezi stadi wanaoibia watu hata kwenye Twawaaf, Allaah Awahidi.

8-Madukani - Sokoni

Yamejaa tele barabarani. Lakini, nasaha muhimu kuwa usipoteze muda wako mwingi humo kwani uloliendea kuu ni kutekeleza Hajj. Pia

unaponunua usibishane sana na muuzaji ukaharibu Hajj yako; mambo hayo Amekataza Allaah (سبحانه وتعالى):

فَمَنْ فَرَضَ فِيهِنَّ الْحَجَّ فَلَا رَفَثَ وَلَا فُسُوقَ وَلَا جِدَالَ فِي الْحَجِّ

((Na atakayekusudia kuhiji (akahirimia), basi asifanye tendo la ndoa wala ufasiki wala mabishano katika Hajj.))²

9-Wazee Na Wagonjwa

Kuna huduma za *Twawaaf* na *As-Sa'-y* kwa watu wazima wasiojiweza. Wanaitwa *Mutwawwif*. Huwabeba katika viti na kukufanyisha *Twawaaf* na *As-Sa'-y* kwa malipo.

10-Vifo

Utahudhuruia Swalaah ya Janaazah takriban kila baada ya Swalaah. Jifunze Swalaah hiyo katika mlango wa 18.

² Al-Baqarah (2: 197).